


Ravi Shakya



सर्वोच्च अदालत ब्यूगु

नेपालभाषा विरुद्धया

अरुतरित आदेश

नेपालभाषा संघर्ष समिति

त्वाःछँ , थायसदु, यँ ।

ने.स. १११८

भीगु विरोध छाया ?

यें महानगरपालिकाय नेपालभाषा व राजविराज नगरपालिका व धनुषा जिल्ला विकास समितिया ज्याखँय नेपालभाषा व मैथिलि भाय छचले दइमखु धकाः सर्वोच्च अदालतया सिङ्गल वेञ्चया इजलासं गुगु अन्तरिम आदेश बीगु ज्या यात, व स्वयेबले थ्व छगू सामान्य कानूनी प्रकृया थें जक खने दुसां थ्वया ल्युने सुलाच्चंगु आसय व थुकी ल्हाः तयाच्चपिं छथः जातीय अंहकारवादी साम्प्रदायीक तत्त्वतय षडयन्त्रयात थुइकेबलय थ्व वास्तवय भी नेवाःया नापनापं नेपाःया गैर खँय जनजातीतयसं ल्हानावयाच्चंगु मांभाययात सदांया नितिं न्हंकाच्छयैगु तातुनाया लिचः खः । उकिसनं भी नेवाःतय नितिं ला थ्व ने.सं. ८८८ या लिपा वःगु मेगु अतिक ग्यानापुगु हाथ्या खः ।

नेवाःत थःपिहे तःता धर्माभ्वलवी, तःता नश्ल व तःता धर्म संस्कृति त्वाकज्यानाच्चपिं मनूतयगु समुदाय खः । नेवाःतय पुचलय सकसियां मंकाःगु सम्पत्ती धैगु भीसं ल्हाना वयाच्चनागु भीगु मांभाय नेवाः भाय खः । भी सकलें नेवाः खः धैगुया मू म्हसिका थ्वहे नेवाः भाय खः । यदि भीके थ्व नेवाः भाय मल्यनिगु जुल धाःसा भी नेवाः खः धैगुया चिं तक नं ल्यनाच्चनि मखु । अले भीसं थःत नेवाः खः धकाः गौरव यायेगु नं केवल फुस्कलुगु खँ जक जुयाबी । वास्तवय भी नेवाःतय म्हसीकाया मू लिधंसा धैगु हे नेवाः भाय खः, नेवाःतय भाययात न्हंके फत धाःसा इतिहासं नेवाःत हे न्हना वनी धैगु खँ थुइकाः हे जाति अंहकारवादी तत्त्वतयसं भी नेवाःतय जीवनय नेवाः भाय छचलीगु गुगुं अवसर मवयेमा धकाः पनेगु नितिं हे थुकथं अन्तरिम आदेश बियाः भीगु भाययात लिक्केगु ज्या यानाच्चंगु खः । सम्पूर्ण कानूनी मर्यादा व प्रावधानयात हाचां गायाः अन्तरराष्ट्रिय कानूनयात च्यूताः मतसं सर्वोच्च अदालतं ब्यूगु उगु अन्तरिम आदेश अतिक अन्यायपूर्ण व अप्रजातान्त्रिक खः । थुकिया विरोध यायेगु प्रत्येक प्रजातन्त्रप्रेमी मानव अधिकारवादी व समतावादी मनूतयगु कर्तव्य खः । उकिसनं थःगु हे जातिय अस्तित्वया विरुद्ध ल्त्वंगु थुगु षडयन्त्रया विरोधय दनेगु सकल नेवाःया कर्तव्य खः । थ्वहे खँ ध्वाथुइकेत थुगु सफूचा सकसियां न्हचःने पितबीगु आवश्यक तायेकागु खत । थुगु सफूचाय सर्वोच्च अदालतं ब्यूगु अन्तरिम आदेशयात संविधान व कानूनया लिधंसाय ध्वाथुइकेगु कुतः यानागु ला जु हे जुल । थुकिया नापनापं ब्रूमिपित्त थ्व सम्बन्धय अफ्न उक्चः खँया ज्ञान दयेमा धकाः नेपाःया संविधानतय भाषा, जाति, व धर्म आदि सम्बन्धी जुयाच्चंगु व्यवस्थाया लिसं थीथी अन्तरराष्ट्रिय कानूनया पाखें निर्देशित खँ नं गुलि फत उलि दुथ्याका तयागु दु । नापं श्री ५या सरकारं नीस्वंगु थीथी निगु आयोगया पाखें जाति भाषा सम्बन्धय सरकारयात बियातःगु सुफाव बारे सुसूचित जुइफयेमा धकाः नं दुथ्याकागु जुल । भलसा काये थ्व सकतां यथार्थया अध्ययन यानाः भी नेवाःतयसं थःगु भाषा व जातीय म्हसीका ल्यंकातयेत थःगु दायित्व व कर्तव्य थुइकाः माःगु पलाः ल्त्वनी ।

मल्ल के. सुन्दर

काजि

नेपालभाषा संघर्ष समिति

नेपालभाषाया सम्बन्धय् अदालतं ब्यूगु

अन्तरिम आदेश

- नेपालभाषाया सम्बन्धय् सर्वोच्च अदालतं छु धकाः अन्तरिम आदेश ब्यूगु खः ?

सर्वोच्च अदालतया वंगु २०५४ साल चैत्र ६ गते न्यायाधीश हरिश्चन्द्र प्रसाद उपाध्यायया याकःचिया बेच्चं छगू अन्तरिम आदेश विसैं “नेवारी व मैथली थुज्गु स्थानीय व क्षेत्रीय भाषायात यैं महानगरपालिका व राजविराज नगरपालिका अले जिल्ला बिकास समिति, धनुषाया ज्याय मछ्चले व मछ्चयेके” धकाः पनेगु ज्या याःगु खः । लालबहादुर थापा, डा. हरिप्रसाद पोखेल, यज्ञनिधि दहाल, ध्रुव थेवे व अच्युतरमण अधिकारीपिन्सं महानगरपालिका व नगरपालिकाया ज्याय आधिकारिक कथं नेपालभाषा व मैथिली भाषायात छ्चलेगु सम्बन्धय् याःगु निर्णय नेपाःया संविधान -२०७२ या भावनाया अःखः जुल धकाः यैं महानगरपालिका, राजविराज नगरपालिका, धनुषा जिल्ला बिकास समिति व स्थानीय बिकास मन्त्रालययात विपक्षी दयेकाः सर्वोच्च अदालतय् रीट निवदेन ब्यूगु खः । उकिया लिधंसाय् सर्वोच्च अदालत पाखें थुगु अन्तरिम आदेश ब्यूगु खः ।

- सर्वोच्च अदालतया थुगु अन्तरिम

आदेशयात कयाः झिसं छाया विरोध यायेमाःगु खः ?

सर्वोच्च अदालतया थुगु अन्तरिम आदेशयात कयाः विरोध यायेमाःगु नित्ता मू कारण दु । दक्कले न्हापां थुगु अन्तरिम आदेश गुकथं जारी यात वहे पाय्छि मजू । छाय् धाःसा थये गुगु मुद्दाया सम्बन्धय् अदालतं अन्तरिम आदेश बी न्हयव उगु मुद्दाया पक्ष-विपक्ष निश्चःयात नं अदालतय् हाजिरी जुयाः थःथःगु राय तयेगु ई बीमाः । तर थुगु मुद्दाया सम्बन्धय् विपक्षी दयेकातःगु यैं महानगरपालिकाया लिसेलिसैं राजविराज नगरपालिका व धनुषा जिल्ला बिकास समिति यात अदालतय् वयाः थःगु पक्षया बिचाः प्वंकेगु अवसर बीगु ला छ्छे हे थ्व मुद्दाया सम्बन्धय् सामान्य सुचं तक हे मबिसैं मुद्दा ब्यूपिं छ्छ्वःया (एक पक्षीय) बिचाः जक न्यनाः थुगु अन्तरिम आदेश बीगु ज्या जुल गुगु नेपाःया न्यायिक परम्पराया अःखः खः । अथेहे थ्वहे सम्बन्धय् अधिवक्ता लिलामणी पौडेल व सुदीप पौडेलपिन्सं थ्व सिबें यक्व न्हयव हे तःगु रीट निवेदनयात कयाः डिभिजन बेच्चया इजलासपाखें अन्तरिम आदेश बीमाःगु आवश्यकता मदु धकाः स्वःछीगु ज्या २०५४ कात्तिक २२ गतेया इजलासं याये धुंकूगु

खः । छगू हे विषयया मुद्दाय् उगु हे अदालतया छगू तँ च्वय्या डिभिजन बेञ्चं अन्तरिम आदेश बी म्वाः धकाः धाये धुंकाः लिपा २०५४ चैत्र ६ गते छगू तँ च्वय्या सिङ्गल बेञ्चं उकिया अःखः अन्तरिम आदेश बीगु धैगु सर्वोच्च अदालतपाखें सर्वोच्च अदालतया न्हापाया व्वःछिनायात अपहेलना यायेगु ज्या जूगु खः । सामान्यतयाः थथे गुगुं मुद्दाय् अन्तरिम आदेश उबले जक बी गुबले उज्वःगु अन्तरिम आदेश मबीवं जाहेरवाला वा मुद्दा तःपिनि पक्षय् तत्काल अन्याय जुल वा अधिकार हनन जुल । महानगरपालिकापाखें नेपालभाषायात आधिकारिक भाषा कथं मान्यता बियाच्वंगुयात थथें मपन धाःसा जाहेरवालातय्त छु हानी नोक्सानी जुइसा ? यदि नेपालभाषायात थथे आधिकारिक भाय् कथं महानगरपालिकाय् छचःगुलिं सुयां अधिकार हनन जुल वा सुयातं अन्याय जुल धैगु खःसा थुगु निर्णय कार्यान्वयन जूगु २०५४ सावन १० गते निसैं मुद्दा तःगु न्हि २०५४ चैत्र ६ गते तक सुयात वा गुगु पक्षयात गुकथंया नकारात्मक लिचः लाकल धैगु सम्बन्धय् जाहेरवालां नं दावी यायेमाःगु खःसा अन्तरिम आदेश ब्यूगु सर्वोच्चया इजलासं नं तछ्छानाः दसि बी फयेकेमाःगु खः, तर गुगुं नं कथं कानून सम्मत मजगु अले अथे छुं दसि मदयेक, गुगुं कारण मदयेक केवल मनोगत रुपय् याःगु सर्वोच्चया अन्तरिम आदेश वास्तवय् नेपालभाषीया नापनापं देया मेमेगु राष्ट्रिय भाय्या विकासया लँपु पनेगु नितीं अतिकं साम्प्रदायीक भावना तयाः, पूर्वाग्रहित जुयाः याःगु ज्या जूगुलिं थुकिया विरोध यायेगु भी

सकसियां मंकाः दायित्व जूवःगु खः ।

- सर्वोच्च अदालतया सिङ्गल बेञ्चया इजलासं नेपालभाषा व मैथिलीभाषाया सम्बन्धय् ब्यूगु अन्तरिम आदेश छु नेपाःया संविधान-२०४७ सम्मत खःला ?

खतुं ऐन, कानून व संविधानया दक्कले उज्वः पालना यायेगु ज्या अदालत पाखें जुइमाः, छाय्धाःसा राष्ट्र दुनेया गुम्हं नं ब्यक्ति वा संस्था पाखें ऐन, कानून व संविधानया पालना याः, मयाः व याःगु पाय्छि खः वा मखुं धकाः उकिया अन्तिम निर्णय बीगु भाला अदालतया खः । अदालत पाखें संविधानया पालना मयासैं अपहेलना यायेगु जुयाविल धाःसा अदालत प्रतिया आस्था म्हो जुयावनिगु जक मखसैं छगू अराजक स्थिति यात हे ब्वलंका बी । नेपालभाषा व मैथिली भाषाया सम्बन्धय् २०५४ चैत्र ६ गते च्वंगु सर्वोच्च अदालतया न्यायाधीश हरिश्चन्द्र प्रसाद उपाध्यायया सिङ्गल बेञ्चया इजलासं ब्यूगु अन्तरिम आदेश तःता कथं हे संविधानया भावनाया अःखः जूवंगु दु । दक्कले न्हापांला नेपाःया संविधान-२०४७ या धारा-६ (२) कथं नेपाःया दुने थीथी थासय् मांभाय् कथं ल्हाना वयाच्वंगु भाय् यात “राष्ट्रिय भाय्” खः धकाः मान्यता बिया तःगु दु । तर सर्वोच्च अदालतया उगु अन्तरिम आदेशं ला नेपालभाषा व मैथिलीभाषायात “स्थानीय व क्षेत्रीय भाय्” धकाः धाःगु दु । नेपालय् मनूतयसं थःगु मांभाय् कथं ल्हाना वयाच्वंगु नेपालभाषा व मैथिलीभाषा नेपाःया संविधान कथं “राष्ट्रिय भाषा” खः । स्थानीय वा क्षेत्रीय भाय् मखु । नेपाःया संविधान

“राष्ट्रिय भाषा” धका: वियांत:गु मान्यतायात अवमूल्यन यायेकथं सर्वोच्चया उगु अन्तरिम आदेशं “स्थानीय व क्षेत्रीय भाषा” धका: धायेगु संविधान सम्मतं मजू । नेपा:या वर्तमान संविधानय नेपा:यात त:ता जाति, भाषा व संस्कृति दुगु दे धका: स्वीकार यानात:गु जक मखसं राज्य सम्बन्धी निर्देशक सिद्धान्तय धारा-२५(३) व धारा - २६(२) - दे दुनेया विविधतायात ल्यंका: थीथी संस्कृति, जाति, भाषा व लिपिया विकास याना: विविधताय एकता स्वातुका: नेपा:या राष्ट्रियता बलाकेगु - सरकारया नीति जुइ धका: स्पष्ट कथं न्थयथना त:गु दु । अथे हे थ्व हे संविधानया धारा १८ (१) स - नेपाल अधिराज्यय च्वनाच्वंपिं सकल समुदाय पाखें थ:थ:गु भाषा, लिपि, संस्कृतिया संरक्षण व समवर्द्धन यायेगु अधिकार दु - धका: अधिकार वियात:गु नं दु । संविधानया थुकथंया अधिकारया दुने च्वना: यैं महानगरपालिका, राजविराज नगरपालिका व जिल्ला विकास समिति, धनुषा पाखें नेपालभाषा व मैथिलीभाषायात आधिकारिक कथं मान्यता ब्यूगु ख: । उकिं थुकियात पने कथं सर्वोच्च अदालत पाखें ब्यूगु अन्तरिम आदेश गुगुं नं कथं संविधानया भावना व ममं कथं मजू ।

- यैं महानगरपालिका व मेमेगु नगर पालिका पाखें नेपालभाषा व मैथिलीभाषायात थ:थ:गु ज्याखँय आधिकारिक भाय् कथं मान्यता बीमा:गु छाय् ?

नेपालभाषा व मैथिलीभाषा नेपालय दुने जनतां वलब्द: दं न्थयव निसैं ल्हाना

वयाच्वंगु पुलांगु नापनापं अतिकं प्राचीन साहित्य संस्कृतिया धुक दुगु त:मिगु भाय् ख: । थ्व निगुलिं भाय्या थ:थ:गु लिपि नं दु । थुज्व:गु ऐतिहासिक महत्वं जा:गु भाय्या संरक्षण यायेगु व सम्बर्द्धन यायेगु सकसियां दायित्व व कर्तव्य ख: । उकिसनं महानगरपालिका ऐन २०४९या दफा १५(१) त व १५(२) यापाखें यानात:गु व्यवस्था कथं थथे लिपि,भाषा, व संस्कृतिया संरक्षण व सम्बर्द्धन यायेगु कानूनी कर्तव्य व दायित्वया दुने हे लाकात:गु दु । भाषाया संरक्षण व विकास धैगु उकियात व्यवहारय छचलेगु ख: । थ्व हे खंयात थुइका: हे थ:गु कानूनी कर्तव्य व दायित्वया दुने च्वना: थथे आधिकारिक मान्यता बीगु ज्या या:गु ख: । महानगरपालिकाया थुगु क्व:छिनायात नेपा:या मूमू राजनैतिक दल पाखें उधिमय वक्तव्य विया: लसकुस या:गु खँ नं थुथाय लुमंकेबह: जू । मेगु खँ छु नं ख: धा:सा यैं महानगरपालिकाया दुने ला न्हापा २०१५ साल बैशाख ६ गते उब्बेया नाय: प्रयागराज सिंह स्वालया अध्यक्षताय च्वंगु वोर्डया मूज्यां नेपाल-भाषायात आधिकारिक कथं छचलेगु धका: क्व:छिनातये धंकुगु ख: । २०१७ साल पस १ गते लिपा निर्दलीय निरंकुश वातावरणय लिंकुंका ब्यूगु थुगु नीतियात आ: २०४७ साल लिपा प्रजातन्त्र पुनर्स्थापना जुया: चकंगु वातावरणया भावना कथं उगु हे पुलांगु क्व:छिनायात हानं न्थ्याकेत स्व:गु ख: ।

- नेपालभाषायात यैं महानगरपालिकाय आधिकारिक भाय् कथं मान्यता बीगुलि गुगुं

छगू राजनीतिक पुचः व सुं छम्ह निम्ह मनूया जक स्वार्थ सुलाच्चंगु खः धाइ ?

स्थानीय इकाइया २०५४ सालय जुगु निर्वाचनया भवलय खास यानाः यें महानगरपालिका दुने फुक्क धैथें राजनीतिक पार्टीतय पाखें थःगु घोषणा-पत्र व ज्याभवः पितब्यूबलय नेपालभाषायात आधिकारिक कथं थाय् बीगु सम्बन्धय् छगू हे कथंया प्रस्ताव न्ह्यःने हःगु खः । थ्वहे भवलय आःया मेयर व वय्कःया राजनीतिक पुचःया उम्मेदवारतयसं नं थःपिं त्यानावन धाःसा नेपालभाषायात महानगरपालिकाय् आधिकारिक भाषा कथं थाय् बीगु धकाः प्रतिबद्धता क्यनाः भोट पंगु व वय्कःपिनि नेपालभाषा प्रति थुकथंया प्रतिबद्धताय् जनतां अभिमत जाहेर यानाः बहुमतं त्याका छवःगु खः । उकिं नेपालभाषायात यें महानगरपालिकाया आधिकारिक भाषा कथं छचलेगु धैगु स्थानीय निर्वाचनय् प्राप्त जनताया अभिमतयात व्यवहारय् छचलेगु प्रजातान्त्रिक संस्कार खत । नापं थीथी राजनीतिक पार्टीया प्रतिनिधित दुध्याःगु यें महानगरपालिकाया २०५४ सावन १० गतेया वोर्ड मुँज्यां नेपालभाषायात आधिकारिक मान्यता बीत याःगु निर्णय गुगुं छगू पार्टीया प्रस्ताव कथं मखसें उगु महानगरपालिका पाखें नीस्वना तःगु कार्यदलया प्रतिवेदनया लिधंसाय् दक्व राजनीतिक पार्टी पाखें त्यानावःपिं प्रतिनिधिपिनि सर्वसम्मतिं क्वःछचूगु खः । उकिं थ्व छगू राजनैतिक सर्वसम्मतिया लिच्वः खः, गुगुं छगू विशेष राजनीतिक पुचः वा ब्यक्तिया स्वार्थ कथं मखु ।

- नेपालभाषायात महानगरपालिकाया ज्याखँय् छचले दइगु आधिकारिक भाषा धकाः मान्यता बीवं आः तक अन छचला वयाच्चंगु नेपाली भाय् ल्हाइपिनिगु अधिकार हनन मज्जला ?

वास्तवय्, दक्कले तःधंगु भ्रम हे थ्व खः । नेपालभाषायात वा मैथिलीयात थथे आधिकारिक भाय् कथं मान्यता बीवं नेपाली भाय्यात चीकेत स्वःगु खः धकाः हुइनाभुइना यानाच्चंगु दु । तर यथार्थय् खँ अथे मखु, यें महानगरपालिका वा मेमेगु नगरपालिका पाखें नेपालभाषायात व मैथिली भाषायात मान्यता ब्यूबलय् आर्विलि नेपालीया नापनापं थुगु भाय् नं छचले दइगु जुल धकाः सम्बन्धित भाय्या मनूतय् तथे अधिकार ब्यूगु जक खः । न्हापालिका छचला वयाच्चंगु नेपाली भाय् छचले मन्त वा मजिल धकाः धाःगु मखु । थुकिं यानाः नेवाः भाय् मथूपिनि अधिकार हनन यायेगु ज्या जूगु नं मदु अभित थुकिं गुगुं व्यवहारिक पंगः थनाः थाकुका ब्यूगु नं मखु ।

- नेपाःया संविधानय् देवनागरीं च्वया तःगु नेपाली भाय् सरकारी ज्याखँया भाय् जुइ धकाः स्पष्ट कथं धयातये धुंकाः नगरपालिका वा महानगरपालिकाया ज्याखँय् मेगु गुंगु भाय्यात छचलेगु धैगु संविधानयात हाचां गायेगु कथं मज्जला ?

खः, नेपाःया संविधानया धारा ६ (१) कथं नेपाली भाय्यात नेपाल अधिराज्यया “राष्ट्र भाषा” जक धयातःगु मखसें “देवनागरी

लिपिं च्यातःगु नेपाली भाषा सरकारी ज्याखँया भाय् जुइ" धकाः नं न्ह्यथनातःगु दु । तर, थन स्पष्ट जुइमाःगु छु धाःसा संविधानयापाखें नेपाली भाषायात "सरकारी ज्याखँया भाय् जुइ" धकाः जक धयातःगु खः, सरकारी वाहेक ममेगु ज्याखँय् नं नेपाली भाय् हे छचलेमाः धकाः मधाः । महानगरपालिका ऐन - २०४९ (२०५२ या संशोधन नापं) पाखें यानातःगु ब्याख्या कथं महानगरपालिका धैगु गुगुं सरकारी कार्यालय मखु, थ्व छगू स्वतन्त्र, स्वायत्त, जन-निर्वाचित इकाइ खः । थन दुने सरकारी कार्यालययात दयेकातःगु नियम व नीति लागू जुइमाःगु बाध्यता मदु । अले थ्वहे ऐनया दफा १५ (१) (त) व १५(२)ड पाखें यानातःगु व्यवस्था कथं महानगरपालिकाया थःगु लागा दुने च्वंगु "थीथी जाति, भाय्, धर्म व संस्कृतिया संरक्षण व सम्बर्द्धनया ज्या यायेगु" कर्तव्य व दायित्व कथं न्ह्यथनातःगु दु । अथे धैगु महानगरपालिकां थःगु लागा दुनेया नेपालभाषा थुज्वःगु प्राचीनतम भाय्या संरक्षण व सम्बर्द्धनया ज्या न्ह्याकेगु ला सम्बन्धित ऐन पाखें भाला बियातःगु छता कर्तव्य हे खत । यदि महानगरपालिका पाखें नेपालभाषायात मान्यता बियाः थुकियात संरक्षण व सम्बर्द्धनया ज्या मन्त्याकूगु जूसा शायद कानून सम्मत कर्तव्यया पालना मयाःगु खनेदइगु जुइ । मेखे संविधानया हे खं ल्हायेबलय् नेपाली भाषायात सरकारी ज्याखँया भाय् धकाः धयातःसां नेपालीया नापनापं सरकारी ज्याय् तिबः जुइ कथं ममेगु भाय् छचलाः उकिया ग्वाहालि कायेमज्यू धकाः नं गनातःगु मदु । यदि थथे नेपालीया नापनापं सरकारी ज्याखँय्

मेमेगु भाय्या ग्वाहालि कायेकथं छचलेगु गैरसंवैधानिक जुइगु खःसा आः तक श्री ५ या सरकारया ज्याखँय् अंग्रेजी भाय् छचला वयाच्वंगु नं तप्यंक गैरसंवैधानिक जुइगु जुल ।

- छम्ह नेवाः मनु यँ महानगरपालिकाया मेयर जूगु इलय् लाकाः थथे नेपालभाषायात आधिकारिक भाय् कथं गुगु मान्यता बीगु ज्या यात थ्व केवल नेवाःतय्के दुगु छगू भाषिक संकीर्णता व साम्प्रदायिक भावनाया चिं खः, थुज्वःगु ज्यां नेपाः दुनेया थीथी जातितय् दथुइया सदभावया वातावरणयात स्यंकीगु जुल धकाः धयाच्वंपिं नं दुनि ।

थ्व सम्बन्धय् तःता कथंया खँ बयबय याना वयाच्वंगुलिं यानाः मेपिनि पुचलय् जक मखु थः नेवाःतय् दथुइ नं धाथेया खँ छु खः धैगु बांलांक ध्वामथू । थथे भ्रम ब्वलनाच्वंगुया छता मू कारण जाती भाषा सम्बन्धी समस्या धैगु नं मानव अधिकारनाप स्वानाच्वंगु समस्या खः धकाः मथूगुलिं खः । देया संविधानपाखें हे - सकलें नेपाःमि उथें खः, सुयातं नं जाति, भाषा, संस्कृति, लिङ्ग व वर्णया लिधंसाय् गुगुं पनपक्ष याइ मखु धकाः घोषणा यानातःगु दु । अथेहे राष्ट्र संघया विश्वव्यापि मानवअधिकार सम्बन्धी घोषणा - १९४८ व उकिया लिपाया मेमेगु आपालं सन्धी, अभिसन्धी पाखें खासयानाः अल्पसंख्यक जाति, जनजाति व भाषा भाषीतय् थःथःगु लागाय् उमिगु भाषा, लिपि, धर्म व संस्कृति गुगुं पंगः मदयेक छचले दयेमाः धकाः अधिकार प्रत्याभूत यानातःगु दु । उलि जक मखु गुगुं नं देया ऐन कानून थुकथंया

अल्पसंख्यकतय् अधिकार प्रत्याभूत याकेगुली मगाः मचाः थें च्वंसा अनया सरकारं उघिमय माःकथंया कानून हीकेगु वा न्हूगु दयेकेगु ज्या यायेमाः धकाः समेत निर्देशन बियातःगु दु । नेपाःया वर्तमान संविधानया प्रस्तावनाय् मानव अधिकारया सम्वन्धय् थःगु प्रतिवद्धता क्यने धुंकाः उकथंया मानव अधिकार जाति जन-जाति व भाषा भाषीतय् सम्वन्धय् गुकथं प्रत्याभूत याकेगु धैगुली नुगः बीगु स्वयं सरकारया हे भाला खःसा मेखे थुगु संविधानयात स्वीकार याना वयाच्चीपं सकसियां दायित्व नं खः । यदि मानव अधिकारया आधारभूत खं समानतायात निर्विवाद कथं स्वीकार यायेगु खत धाःसा देया संविधान पाखें “राष्ट्रिय भाषा” धकाः मान्यता बियातये धुंकूगु नेपालभाषा व मेमेगु जन-जातितय् मांभायया अधिकार क्षेत्र छु खः ? प्रजातन्त्रया पुनर्स्थापना जुइ धुंकाः नेपाली जनता कानूनया मिखाय् समान खः धकाः धाःगुया व्यवहारिक अर्थ छु खः ? यदि नेवाःतय् आदिभूमि स्वनिगलय् हे नेवाःतय्सं थःगु मांभाय नेपालभाषायात व मैथिलीतय्सं मिथिलाञ्चल लागाय मैथिली भाय् छचले मदइगु जुल धाःसा संविधानयापाखें “राष्ट्रिय भाषा” धकाः बियातःगु मान्यता व समानताया अर्थ छु जुल ? राष्ट्रसंघया दुने नेपाःया प्रतिनिधित्व याकेगु भवलय् नेपालभाषाया लिपियात थाय् बी ज्यू तर वहे नेवाःतय् मांभाय नेपालय् उकिसनं स्वनिगलय् थाय् मदइगुया अर्थ छु ? वास्तवय् समाजय् प्रजातन्त्र उब्जे जक क्वातुइ गुब्जे प्रजातन्त्रया सिद्धान्त कथं समानताया अधिकार सकसिनं व्यवहारय् उपभोग यायेगु अवसर नं दइ ।

प्रजातन्त्रया नामय् आः नं पञ्चायतया इलय् थें “छगू हे भाषा, छगू हे पुंसा” धैगु नीतियात क्वचिनेगु जुल धाःसा उकिं प्रजातन्त्रया नामय् अनास्था ब्वलंका बी । अले मनूत विकल्पया लँपु मालेत वाध्य जुइ । भाषा जातिया अधिकारया सः तयेगु, थुकियां नितिं पलाः ल्हवनेगु धैगु नं वास्तवय् मानव अधिकार वहालीया नितिं यायेगु सकारात्मक कुतः खः । यें महानगरपालिका पाखें नेपालभाषायात व राजविराज नगरपालिका अले धनुषा जिल्ला विकास समिति पाखें मैथिलीयात थःथःगु लागाय छचलेत व्यूगु मान्यता वास्तवय् गुगु साम्प्रदायीक पलाः मखसैं थःथःगु भाषा संरक्षणया भवलय् याःगु बांलागु कुतः खःसा मेमेपिनि नितिं नं अनुकरणिय ज्या खः । थुज्वःगु हे पलाखं नेपाः थुज्वःगु तःता जाति भाय् व संस्कृति दुगु देसय् साम्प्रदायीकता व जातीय संकीर्णता ब्वलंकीगु मखसैं भीगु संविधानयापाखें परिकल्पना यानातः कथं विविधतायात ल्यंकाः राष्ट्रियतायात क्वातुकेगुलि तिबः बी । थ्व छम्ह नेवाः वा मैथिली भाषी जूगुयां नातां जक यायेमाःगु मखसैं प्रजातन्त्र व समानता प्रति प्रतिवद्ध सकलया दायित्व खः ।

- नेपालभाषा वा मैथिली भाषायात थुकथं आधिकारिक रुपं छचलाबुलाय् हयेवं नेपाःया राष्ट्रिय एकताया लिधंसा जुयाच्वंगु नेपाली भाय् जक मखु नेपाःया राष्ट्रियता हे कमजोर मजुइ ला ?

नेपाली भाय् नेपाःया राष्ट्रिय एकताया लिधंसा धकाः गैर नेपालीभाषा भाषीया छचनय्

जवरजस्ती क्वचिंकैवं हे धाथें राष्ट्रिय एकता क्वातुइ ला ? वरु थुकथं राज्यसत्ताया लिधंसाय जवरजस्ती गुगुं भाय् मेमेगु भाषाभाषीपिनि छचनय् क्वचिंकैगु नीतिं यानाः उगु भाषा प्रति सम्मान व मतिना मखु अनादर व घृणाया भाव मचायेक व्वलंका बी । यदि नेपाली भाय् राष्ट्रिय एकताया लिधंसा खःसा नेपाःया थीथी भाषाभाषीया सकल जनताया नुगलं थ्वैत स्वःस्फूर्त अनुभव यायेगु वातावरण दयेके फयेकेमाः । तर राज्यसत्ता पाखें थ्व सम्बन्धय् जवरजस्ती नीति नालेगु बाहेक मेगु छुं यानाच्चंगु मदु । छखे थुमिसं देया गैर नेपाली भाषा भाषी वा नेपालभाषा व मैथिली थुज्वःगु राष्ट्रिय भाषायात अतिकं सीमित लागाय् छचलेत स्वःवलय् तकं “राष्ट्रिय एकताय् वामलाःगु लिच्वः लाकीगु जुल” धकाः बय्यबय् याना जुल, मेखे थुमिसं नेपाःया शैक्षिक व प्रशासनिक खलय् नेपालीयात विस्थापित याये कथं ग्यानापुक छचला हयाच्चंगु अंग्रेजीया सम्बन्धय् गुब्बं कपाः मस्याकू । अले संस्कृत थुज्वःगु मृत भाषयात अनिवार्य कथं विद्यालय स्तरय् क्वच्यूगुया विरोधय् नं छसः मतः । अजू चायापुगु खं छु धाःसा नेपाःया आमसंचारया खलय् खुल्ला रुपं हस्तक्षेप जुया वयाच्चंगु हिन्दीया सम्बन्धय् गुब्बं आपत्त मतायेकू । वास्तवय् थ्व सकतां थनया मनूतयके दुगु औपनिवेशिक दास मनोवृत्ति व देया जाती जन-जातीतय् विरुद्ध दुगु अहंकारवादया लिच्वः खः ।

- यदि नेपालभाषा व मैथिलि भाषायात थये स्थानीय इकाइया ज्याखँय् आधिकारिक

कथं छचलेत ब्यूगु मान्यता राष्ट्रिय व अन्तरर राष्ट्रिय कानून वा मानव अधिकारया सिद्धान्त कथं पाय्छि हे खः अले थुकिं गुगुं पक्षयात छुं हे स्यंकाच्चंगु मदुसा थ्वयात कयाः छाया थुभनं विरोध यायेगु ज्या जुयाच्चन ?

भीसं स्यू संसारय् सुयातं गुगुं अधिकार बिल धकाः गुब्बं विरोध जुइ मखु, विरोध ला उब्बे जुइ गुब्बे थःगु अधिकारया हनन जुइ । नेपालभाषा व मैथिलीयात स्थानीय इकाईस आधिकारिक भाषा कथं ब्यूगु मान्यतां गुगुं पक्षया अधिकारया हनन मजू । सम्बन्धित भाषाभाषीया पक्षय् थप अधिकार प्राप्त जूगु जक खः । थथे सुनानं सुयातं अधिकार बीवलय् प्रजातन्त्र व मानव अधिकारया पक्षधरत ला भन लयताये माःगु खः । तर थत प्रजातन्त्रवादी धाइपिं व राष्ट्रवादी धाइपिं छथ्वलं थुकिया विरोध जक यानामजू प्राप्त थुगु अधिकारं वञ्चित याकेगु नितीं अदालतय् तकं व्वांय जुल । वास्तवय्, थ्व मेता छुं मखसं नेपाःया समाजय् वंगु निसःत्या दँ न्ह्यव निसं सत्ताया लिधंसाय न्ह्याका वयाच्चंगु जातीय अहंकारवादया छगू अतिकं क्वह्यंगु दसि खः । थुपिं जातिय अहंकारवादी तत्वत गुलि तक असहिष्णु व संकीर्ण धैगुया थ्व छगू घच्चायापुगु किपा खः ।

- थ्व विवादया मुद्दा आः अदालतय् विचरानिधन अवस्थाय् लानाच्चंगु दु । छुं गथे जुयाः अदालतं नं नेपालभाषा व मैथिली भाषाया विरुद्ध फैसला बिल धाःसा छु जुइ ?

नेपाःया संविधानप ाखें जाति भाषाया वारे यानातःगु व्याख्या व व्यवस्था अले

अन्तरराष्ट्रिय कानून व मान्यताया खँ भीसं चवय हे न्ह्यथने धुंगु दु । यदि राष्ट्रिय-अन्तरराष्ट्रिय कानूनी मान्यता अले प्रजातन्त्रया समतावादी आदर्शयात तकं ल्वःमंकाः अदालत पाखें नकारात्मक फैसला बिल धाःसा नेपाःया वर्तमान कानूनी इतिहासय् व छगू हाकुखं जुइगु जक मखसैं अदालत प्रति हे जनतां विद्रोह याइगु अवस्था वइ । उज्वःगु फैसला बिल धाःसा सम्बन्धित महानगरपालिका वा नगर-पालिकायापाखें गुकथं नालाकाइ व ला स्वये हे मानि , तर सम्पूर्ण कानूनी मान्यतायात हाचां गायाः वीगु उज्वःगु पूर्वाग्रहित फैसलायात धाःसा जनस्तरं गुगुनं कथं स्वीकार याइ मखु । प्रजातान्त्रिक समाजय् शाश्वत व सार्वभौम जनता खः, जनतायात गुगुं जनविरोधी व मानव अधिकार विरोधी निर्णय , फैसला वा कानूनया अस्विकार यायेगु अधिकार सुरक्षित दु ।

दुपिन्त संगठित यायेगु आवश्यक खः । जातीय अहंकारवादीतयसं भी नेवाःभाय् ल्हाइपिनि विरुद्ध न्ह्याकूगु थ्व पलाः स्वयेबले छुं मखु थें च्वंसां थुंकिया ल्यूने सुलाच्वंगु आसय धैगु नेवाः भाय्यात सदांया नितीं न्हंका व्छयेगु व नेवाःतय अस्तित्व मदयेका व्छयेगु पडयन्त्रया लिच्वः खः । नेवाःतय भूमी स्वनिगः दुने हे नेवाःतयत शरणार्थी दयेकेगु दुष्प्रयास खः । आः इलय् हे भी थुंकिया विरुद्ध दनेमफुत धाःसा लिपा हानं गुब्बं भी दने मफयेफु । थ्वहे खँयात वाःचायेकाः वंगु १९९८ चउलागाः ४ (२०५५ बैशाख ३) कन्हु थनया प्रदीप्त पुस्तकालयस थौथी नेवाःतय जातीय पुचः व भाषिक खलः पुचःया प्रतिनिधिपिं नापनापं भाषिक कार्यकर्तातय मंकाः मुँज्या पाखें “नेपालभाषा संघर्ष समिति” नीस्वंगु दु । उगु समिति पाखें थ्व सम्बन्धय् थःगु छुं छुं संघर्षया ज्यभवः न्ह्याके नं धुंकूगु दु ।

- आः थुगु अवस्थाय् नेवाःया नातां झीगु दायीत्व व भूमिका छु खः ?

नेपालभाषाया विरुद्ध सर्वोच्च अदालत पाखें आः गुगु अन्तरिम आदेश बियाः थुंकिया छचलाबुलायात पनेत स्वल थ्व मात्र यें महानगरपालिकाया विरुद्ध जक ब्यूगु आदेश मखु, भी सकल नेपालभाषा भाषीया विरुद्ध राज्यसत्ताया लिधंसाय् न्ह्याकूगु अन्यायपूर्ण पलाः खः । उकिं थुंकिया विरोधय् सकल नेवाःत छप्पं जुयाः दनेगु थौयां आवश्यकता खः । थ्व समस्यायात कयाः त्वाःत्वालय् छेंछा छेंछा पतिकं न्ह्यलं चायेके माःगु दु । थ्व बारे सःपिन्सं स्यूपिन्सं, मस्यूपिन्त कनेगु ध्वाथुइकेगु व संभव



जाति भाषा अधिकार छु खः ?

नेपाः छगू तःता जाति व भाषा भाषीया दे खः । थन तःता कथंया संस्कृति, धर्म व सामाजिक संरचना नं दु । थुज्वःगु देया राष्ट्रियताया लिधंसा धैगु थथे तःता कथंया भाय ल्हाना वयाच्चपिं नागरिकतय् दथुइया मतिना, सदभावना व ग्वाहलिया वातावरणय् ब्वलनीगु मंकाः चाहना व आकांक्षा खः । तर थुज्वःगु विविधतां जाःगु समाजया दुने उब्ले तिनि थवंथवय् मतिना, सदभावना व ग्वाहलिया वातावरण ब्वलने फइ गुब्ले जाति जातिंया वा भाषाभाषीया दथुइ समानताया अवस्था दइ । गुब्ले छगू बलाःगु जातिं मेगु बमलाःगु जातिंयात स्वत्यलेगु वा पनपक्ष यायेगु ज्या मजुइ, गुब्ले जाति जनजाति व भाषाभाषीया बिरुद्ध जुइगु सकतां कथंया उत्पीडनया अन्त्य जुइ । यदि छगू जाति वा भाषा मेगु जाति व भाषायात स्वह्यंकेगु, स्वत्यलेगु व मेमेगु कथंया उत्पीडन ल्यनावंतुं च्वन धायेवं अन जाति जाति वा भाषा भाषीया दथुइ सदभाव व मतिनाया भावना मखसैं छथ्वलं मेगु थ्वःयात घृणायायेगु, तिरस्कार यायेगु व ब्वला सायेगु स्थिति ब्वलनाः समाजय न्ह्याब्लें साम्प्रदायीक कचवं ल्यनाच्वनि । अले दे दुनेया नागरिकतय् दथुइ थवंथवय् दयाच्वनिगु थुज्वःगु असहिष्णु व शत्रुतापूर्ण अवस्थाय राष्ट्रिय एकता गुब्सं क्वातुइ मखु, गुब्सं राष्ट्रियता

धिसिलाइ मखु ।

नेपाः दुने थ्यंमथ्यं ७० प्रतिशत जनता थीथी भाय् ल्हाइपिं थीथी जनजातीया मनूत खः, अथे धैगु नेपालय् भाषा, जांतीया समस्या धैगु नेपाःया ७० प्रतिशत जनताया समस्या खः । देया बहुसंख्यक जनताया थ्व समस्या नेपाःया छगू मू राष्ट्रिय समस्या खः । थ्व समस्यायात खःकथं ज्यंकेत मस्वःतले देया राष्ट्रियता नं क्वातुइ मखु, प्रजातन्त्र नं बल्लाइ मखु । वास्तवय् नेपाःया सन्दर्भय् उब्ले तिनि प्रजातन्त्रया सार्थकता दइ, गुब्ले थ्व देया बहुसंख्यक जनजाती, भाषाभाषीतय् समान अधिकार उपभोग याके वीगु वातावरण ब्वलनि । वास्तवय् थ्व खँ नेपाःया निंतिं जक छगू बिस्कुंगु यथार्थ मखसैं नेपाः थें तःता जाति, भाषा, धर्म, संस्कृति दुगु विश्वया प्रत्येक समाजया निंतिं मनुखं विचाः यायेमाःगु पक्ष खः धैगु खँ थन न्ह्यब्वयाच्वनागु थीथी अन्तरराष्ट्रिय कानून पाखें निर्देशित कर्तव्य, अधिकार व दायीत्वपाखें स्पष्ट यानाच्वंगु दु ।



अन्तरराष्ट्रिय कानूनया दुने जाति , भाषा व अल्पसंख्यकतय् अधिकार

मानवअधिकार सम्बन्धी विश्वव्यापी घोषणापत्र - धारा - २ स ध्यातःगु दु - जाति , रङ्ग, लिङ्ग, भाय्, धर्म,राजनीतिक वा मेगु गुगुं आस्था अले जात , व सामाजिक उत्पतिया श्रोत, तःमि चीमिया लिधंसाय् थुगु विश्वव्यापी घोषणापत्र पाखें कवःछिनातःगु स्वतन्त्रता व अधिकार उपभोग यायेगुली स न मनुयात पनेदइ मखु ।

आर्थिक, सामाजिक व साँस्कृतिक अधिकार सम्बन्धी अन्तरराष्ट्रिय अनुबन्धन भाग- २ या धारा-२या उप-धारा-२पाखें यानातःगु व्यवस्था- सम्बन्धित राज्ययापाखें उधिमय् थुगु अनुबन्धन पाखें व्यवस्था यानातःगु अधिकार उपभोग याकेगु भवलय् जात, रङ्ग, लिङ्ग, भाय्, धर्म, व राजनीतिक वा मेमेगु कथंया आस्थाया लिधंसाय्, सामाजिक उत्पति व तःमि चीमिया ल्याखं गुगुं पनपक्ष याय् दइमखु ।

धारा-१३ उप-धारा-३ स मस्तय् शिक्षाया बारे ध्यातःगु दु - थ्व अनुबन्धननाप स्वापू दुगु सरकारं प्रत्येक मां-अबुयात थः मस्तयत्त राज्य पाखें व्यवस्था यानातःगु शिक्षा सिबें पाक्क उज्वःगु हे स्तरया तर उमिगु आस्था कथंया धार्मिक व नैतिक मूल्यया छु शिक्षा बी धेगु खँय कानूनी संरक्षण बीगु ज्या राज्यं यायेमाः ।

अन्तरराष्ट्रिय साँस्कृतिक सहयोग सम्बन्धी

घोषणापत्र धारा - २ प्रत्येक जातिया मनुयात थःगु संस्कृति कथं जीवन हनेत अधिकार दु थ्व अमिगु कर्तव्य नं खः ।

नागरिक व राजनैतिक अधिकार सम्बन्धी अन्तरराष्ट्रिय अनुबन्धन भाग - १ या धारा - १ सकल जातिया मनुयात आत्मनिर्णय यायेगु अधिकार दु । थ्व हे अधिकारया दुने च्वनाः जातिया मनुखं थःगु राजनैतिक छयःयात कयाः स्वतन्त्रपूर्वक कवःछी अले गुज्वःगु आर्थिक, सामाजिक व साँस्कृतिक लंपु ली । (पाय्छि थ्वहे खँपु उपनिवेशिक मुलुक व जनतायात मुक्ति बीगु सम्बन्ध्य घोषणापत्र या धारा - २ स नं न्हयथनातःगु दु)

भाग - ३ या धारा - २६ सकलें कानूनया मिखाय् उतिग्यं अले कानून पाखें संरक्षण प्राप्त यायेत नं सकसियां उलि हे अधिकार दु । थ्वहे भवलय् गुगुं नं कथंया पनपक्षयात कानून पाखें पनेगु ज्या याइ अले सकलया निंतिं जाति, रङ्ग, लिङ्ग, भाय्, धर्म, राजनैतिक आस्था व विचाः वा समुदायया मूल, जन्म व अवस्थाया लिधंसाय् जुइगु गुगुं नं कथंया पनपक्षयात पनेत उतिग्यक व क्वातुक कानूनी सुरक्षा बीमाः ।

भाग - ३ धारा - २७ उज्वःगु देसय् गन अल्पसंख्यक जाति, धार्मिक पुचः व भाषाभाषी

मनूत दु उज्वःगु देसय थुज्वःगु अल्पसंख्यक पुचःया मनूतयत समाजय दुपिं मेगु पुचःया मनूतयसं उमि थःगु संस्कृति, थःगु धार्मिक विधि विधान व थःगु भाय छचलेगु अमिगु अधिकारयात लिक्कुंके मज्यू ।

मस्तय अधिकार सम्बन्धी घोषणापत्र
धारा - ३० उज्वःगु देसय गन अल्पसंख्यक जनजाति, धार्मिक पुचः, भाषाभाषी वा आदिवासी मूलया मनूतय पुचः दुसा थुज्वःगु पुचःया मस्त वा आदिवासी मस्तयत समाजय दुपिं मेगु पुचःया मनूतयसं उमि थःगु संस्कृति, थःगु धार्मिक विधि विधान व थःगु भाय छचलेगु अमिगु अधिकारयात लिक्कुंके मज्यू ।

शैक्षिक भेदभाव विरुद्ध अनुबन्धन धारा - ५(ग) जनजाति अल्पसंख्यकतयत अमि थःगु कथया शैक्षिक ज्याभवः न्त्याकेगु, विद्यालय चायेकेगु, राज्यसत्ता पाखें न्त्याका वयाच्वंगु शैक्षिक नीतियात नाले वा मनालेगु व थःगु मांभायया माध्यम वा थःगु मांभायया शिक्षा बीगु अधिकारयात मान्यता बीगु अत्यावश्यक खः धेगु खं प्रत्येक राष्ट्रयात मज्जुर दु ।

स्वतन्त्र मुलुकया आदिवासी व जनजातिय सम्बन्धय अनुबन्धन भाग - ६ धारा - २८(१) थुज्वःगु (आदिवासी व जनजाती) पुचःया मस्तयत अमिगु हे भासं वा अमिगु पुचलं दक्कले उज्वः छचला वयाच्वंगु भासं शिक्षा बीमाः । यदि थुकथं शिक्षा बीगु संभव मखुसा सम्बन्धित अधिकारीतयसं उगु पुचः नाप सहलह ब्याकाः शिक्षाया आजु चूलाकेगु लैपु लीमाः ।

भाग - ६ धारा - २८ (२) सम्बन्धित आदिवासी व जनजातिय भायया संरक्षण व सम्बर्द्धनया नितिं उकिया विकास व व्यवहारिक

प्रयोगया नितिं माःगु पलाः राज्यं ल्त्वनेमाः ।

भाग - ६ धारा - ३० (२) माःसा (सम्बन्धित आदिवासी, जनजातीतयत अमिगु अधिकार, कर्तव्य खासयानाः लजगाः, शिक्षा, स्वास्थ्य , सामाजिक कल्याण व थुगु अनुबन्धनं प्रत्याभूत यानातःगु अधिकार) ध्वाथुइकेगु नितिं अमिगु भासं हिइकेगु वा अमिगु भासं आमसंचार माध्यमयात छचलेगु यायेमाः ।

फुक्क कथया जातीवादी पक्षपात उन्मूलन सम्बन्धी घोषणापत्र धारा - २ (२) गुगुं नं सरकार थःगु नीति, व्यवहार वा उज्वःगु छुकिया पाखें नं थुज्वःगु ज्याय हःपाः बीगु, समर्थन यायेगु यायेमज्यू गुकिया पाखें गुम्हं व्यक्ति, पुचः वा संस्थायात जाति, रङ्ग, जनजातीया श्रोतया लिधंसाय गुगु कथया पक्षपातपूर्ण व्यवहार जुइ ।

धारा-४ फुक्क राष्ट्र पाखें राज्य व सरकारया उज्वःगु नीति न्नीकेत , कानून व नियम मदयेकेत क्वातुगु पलाः ल्त्वनेमाः गुकियापाखें जातीवादी पक्षपात ब्वलंकेत वा ल्यंकातयेत आः तक् नं तिवः बियाच्वंगु दु । राष्ट्रयापाखें थुज्वःगु जातीवादी पक्षपात पनेत व थुकथंया जातीवादी पक्षपातपूर्ण पूर्वाग्रहया विरुद्ध पलाः च्वयेकेगु नितिं कानून हे दयेकेमाः ।

धारा- ९ (१) फुक्क कथंया उज्वःगु संगठन व प्रचारया ज्या गुगुं छगू हे जक जाति वा पुचः छगू रङ्गया मनूत वा छगू जनजाती मूलयापिं जक मेपिं सिवें विशिष्ट धकाः वकालत यायेगु वा थथे यानाः गुगुं नं कथं जातिवादी भेदभाव ब्वलंकेगु कुतः कुंखिनेवह जू ।

जातिवाद व जातिवादी पूर्वाग्रह सम्बन्धी घोषणापत्र धारा - १ या उप-धारा - २ प्रत्येक व्यक्ति वा पुचःयात थःगु विस्कं म्हसीका ब्वयेगु

व मेपिं सिवें पाः धकाः तायेकेगु अधिकार दु ।
अथे खःसां म्वायेगु बिस्कं पहः व बिस्कं म्हसीका
ब्ययेगुया गुगुं नं स्थितिइ जातिवादी पूर्वाग्रह
न्त्यब्ययेगु त्वह जुइ मज्यू - कानूनी रुपय् जुइमा
वा ब्यवहारिक जीवनय् गुगु खँ जातीवादया
घच्चायापुगु स्वरुप रङ्गभेद नीतिया लिधंसा थें
जुयामबीमा ।

धारा - २ उप-धारा-१ गुगु नं धारणा
गुकिया पाखें छगू गुगुं जात वा जनजाती पुचः
बुसां निसं थुकथं थप्यं वा ब्वह्यं खंकेगु कि उपिं
ब्वह्यं धकाः धयातःपिन्त शोषण यायेत वा न्हंका
व्छयेत अधिकार प्राप्त खः । गुगु धारणाया लिधंसा
जातिवादी भेदभाव खः, गुकिया गुगुं वैज्ञानिक
लिधंसा मदु, गुगु खँ मानवतावादी सिद्धान्त व
आदर्शया पाय्छि अःखः खः ।

धारा - २ उप - धारा - २ जातिवाद
धैगु जातिगत भेदभाव, जातीय पूर्वाग्रहित
दृष्टिकोण, जातीय पनपक्षपूर्ण व्यवहार खः, उज्वःगु
संरचना, उज्वःगु संस्थागत व्यवहार खः गुकिं
जातिगत असमानतायात ब्वलंकी । अथे हे मनूतय्
पुचःया दथुइ उज्वःगु जातिय भेदभावं जाःगु
त्रुटिपूर्ण व्यवहार गुगु नैतिक आदर्श व वैज्ञानिक
ल्याखं पाय्छि धकाः धायेमछिं । गुगु खँ भेदभावपूर्ण
कानूनी प्रावधान, नियम व पक्षपातपूर्ण व्यवहारया
नापनापं ज्याखँ खः । थुकिं देयात कुचा थलाबी,
अन्तरराष्ट्रिय ग्वाहालिया लँपु पनाबी , जनता
जनताया दथुइ राजनैतिक कचवं ब्वलंकाबी
गुगु खँ अन्तरराष्ट्रिय कानूनया अःखः खः थुज्वःगु
ज्या अन्ततः अन्तरराष्ट्रिय शान्ति व सुरक्षायात
हं लिच्वः लाकाबी ।

जाति, जनजाति, धर्म, व भाषिक
अल्पसंख्यक मनूतय् अधिकार सम्बन्धी घोषणापत्र

धारा - १ या उप-धारा- १ राज्ययापाखें
अल्पसंख्यक जाति , जनजातिया अस्तित्व व उमिगु
सांस्कृतिक, धार्मिक व भाषिक म्हसीकायात
उमिगु हे लागाय ल्यंका तयेत व उकियात
न्त्यज्याकेगु नितिं माःगु हःपाः बीमाः ।

धारा-१ उप-धारा-२ च्वय न्त्यथनागु
आजु पूर्वकेया नितिं राज्य पाखें माःगु कानूनी व
मेमेगु प्रावधानया नं ब्यवस्था याइ ।

धारा - ३ उप-धारा - २ थुगु घोषणापत्रय्
न्त्यथनातःगु गुगुं अधिकार प्रत्याभूत जुयाः वा
मजुयाः अल्पसंख्यक पुचल्य् लाःपिं सुं नं मनूयात
नोकसान जुइगु ज्या मजुइमाः ।

धारा - ४ उप-धारा- २ राज्य पाखें
अल्पसंख्यक मनूतय् थःगु विशेषता न्त्यब्ययेत
उमिगु संस्कृति भाषा, धर्म, परम्परा व रहनसहन
गुगु राष्ट्रिय व कानूनया अःखः व अन्तरराष्ट्रिय
मान्यता नाप पाय्छि मजुगु खः उज्वःगु वाहेक
मेगु संकतांया विकास यायेत सकारात्मक
वातावरण ब्वलंकेत माःगु पलाःल्ह्वनेमाः ।

धारा-४ उप-धारा-३ राज्य पाखें उज्वःगु
पाय्छि पलाः ल्ह्वनेमाः गुकिं यानाः
अल्पसंख्यकतय् थःगु मांभाय् सयेकेत वा मांभासं
स्यनेत माछि अवसर चूलायेमाः ।



नेपाःया संविधानय् जाति भाषाया थाय्

नेपाःया संविधान-२०४७ पाखें देया विविधतां जाःगु सामाजिक यथार्थयात दक्कले न्हापां स्वीकार यासैं धारा(५) १ पाखें नेपाः अधिराज्यया ब्याख्या याःवल्य् - नेपाः छगू तःता जातीय, तःता भाय् दुगु, प्रजातान्त्रिक, स्वतन्त्र, अविभाज्य, सार्वभौमसत्तासम्पन्न, हिन्दु, संवैधानिक राजतन्त्रात्मक अधिराज्य खः - धकाः धाःगु दु ।

संविधानया धारा-६(२) पाखें - नेपाःया थीथी लागाय् मांभाय् कथं ल्हाना वयाच्वंगु फुक्कं भाय् नेपाःया राष्ट्रिय भाय् खः - धकाः मान्यता ब्यूगु दु । यद्यपि संविधानयापाखें थथे राष्ट्रिय भाय् धकाः मान्यता बियातःगु नेपालय् मांभाय् कथं ल्हाना वयाच्वंगु भाय्या अधिकार क्षेत्र, प्रयोगया क्षेत्र व राज्यसत्ताया थ्व भाय् प्रतिया दायित्व व जिम्मेवारीयात कयाः छुं धयातःगु मदु ।

तर संविधानया थ्व हे धाराया उप-धारा (१) स राष्ट्र भाषाया ल्याखं देवनागरी लिपिइ नेपाली भाय् नेपाःया राष्ट्र भाय् खः । नेपाली भाय् सरकारी ज्याखँय् छचलीगु भाय् जुइ - धकाः धासैं नेपाली भाय् व देया गैर नेपाली भाय्या दथुइ छगू भिन्नताया संवैधानिक अवस्था ब्वलंकूगु दु । अले नेपालीयात जक सरकारी ज्याखँय् छचलीगु भाय् धयाः मेमेगु भाय्या न्त्यःने थ्व भाय्यात छतँ च्वय् तयेगु

ज्या याःगु दु । गुगु समानताया सिद्धान्त कथं पाय्छि मजू ।

संविधानया भाग - ३ स नागरिकतय् मौलिक हकया सम्बन्धय् यानातःगु अधिकारया धारा- ११(२)स - सामान्यतयाः कानूनया छचलाय् सुं नं नागरिकयात धर्म, वर्ण, लिङ्ग, जात, जाति, वा वैचारिक आस्थाया लिधंसाय् वा उपिं मध्येया गुगुं खँया लिधंसाय् पाकेगु जुइमखु । धकाः धयातःगु दुसा उगु हे धाराया (३) पाखें - राज्यं नागरिकतय् दथुइ धर्म, वर्ण, लिङ्ग, जात, जाती, वा वैचारिक आस्था वा उपिं मध्येया गुगुं खँया लिधंसाय् पाकेगु जुइमखु धकाः नं धयातःगु दु ।

संविधानया धारा-१८(१) पाखें संस्कृति व शिक्षा सम्बन्धी हकयात कयाः छु धयातःगु दु धाःसा - नेपाः दे दुने च्वनाच्वपिं फुक्क समुदाययात थःगु भाय्, लिपि व संस्कृतिया संरक्षण व सम्बर्द्धन यायेगु अधिकार दु ।

थ्वहे धाराया उप-धारा(२)पाखें बियातःगु मेगु अधिकार खः - फुक्क समुदायया मस्तयत प्राथमिक तगिं तक थःगु मांभासं शिक्षा बी कथंया विद्यालयल चयेके दइ - तर थ्व ज्याय् राज्यसत्ताया भाला छु धैगु स्पष्ट यानातःगु मदु ।

संविधानया भाग - ४ पाखें राज्यया निर्देशक सिद्धान्त व नीतियात कयाः ब्याख्या यायेगु भवलय् धारा-२५ उप-धारा (३) स

न्त्यथनातःकथं - फुक्क कथया आर्थिक व सामाजिक असमानतायात चीकाः तःता जात, जाति, धर्म, वर्ण व सम्प्रदायया दथुइ क्वातुगु स्वापू तयाः न्याय व नैतिकताया लिधंसाय स्वस्थ सामाजिक जीवन स्वनेगु व न्त्यज्याकेगु हे राज्यया सामाजिक उद्देश्य खः।

अथे हे थ्व हे भागया धारा-२६ उप-धारा(२)स राज्यया नीति कथं छु धयातःगु दु धाःसा - थीथी धर्म, जात, जाति, सम्प्रदाय व भाषाभाषीतय दथुइ बांलाःगु व क्वातुगु सामाजिक स्वापू न्त्याकाः सकलया भाय, साहित्य, लिपि, कला व संस्कृतिया विकासया लंपु देया तःता कथया सांस्कृतिक पहयात

त्यंकाः राष्ट्रिय एकता क्वातुकेगु नीति राज्य पाखें नाली ।

दक्कले महत्वपूर्ण खं छु धाःसा नेपाःया थ्व संविधानया (प्रस्तावना) न्त्यखँय - सकल नेपाःया नागरिकया आधारभूत मानवअधिकार सुरक्षित यासैं स्वतन्त्रता व समानताया लिधंसाय नेपाःमिया दथुइ भातृत्व व एकता क्वातुकाः वालिग मताधिकार, संसदीय शासन प्रणाली, संवैधानिक राजतन्त्र व बहुदलीय प्रजातन्त्रयात धिसिलाकेत प्रतिबद्धता क्यनातःगु दु ।



श्री ७ या सरकारं नीस्वंगु जाती भाषा सम्बन्धी थीथी आयोगया सुझाव

राष्ट्रिय भाषा नीति सुझाव आयोग (२०५० जेठ १४ गते नीस्वंगु संयोजक तिलबिक्रम नेम्बाङ्ग)

सम्बन्धित भाषाभाषीतयत्त उप्पः हःपाः दइ । (पौ - २०)

नेपाली भाय् (छगू भाय् छगू भेषया नीति) यात थुकथं हःपाः ब्यूगुया ल्यूने तर्क छु द धाःसा थुकथंया भाषा नीति पाखें राष्ट्रिय एकता क्वातुकेत तिबः जुइ । थ्वया अःखः वास्तविकता छु खः धाःसां नेपाः छता जक भाय् ल्हाइपिनि दे मखु बरु थ्व भाषिक विविधता दुगु दे खः । थुज्वःगुलि छता भाय्यात थाय् बियाः उकियात राष्ट्रया फुक्क सम्प्रेषणीयता पूर्वकेगु भालाबीगु तर्कसंगत मजू ।

नेपाः थुज्वःगु तःता भाय् दुगु देसय् गुगुं छगू जक भाय्यात थुकथं थाय् बिइवं छचलाबुलाय् मवयाः मेमेगु भाय्त लिक्नुावनी । (पौ - १९)

तर तःता भाय्या छचलाया नापनापं थीथी भाय्या संरक्षण व सम्बर्द्धन यायेगु ज्या उब्ले तक संभव जुइ मखु गुब्ले तक उगु भाय्यात जीवनया थीथी खलय् छचलेगु याइमखु । थुज्वःगु ज्यां मांभाय्या छचला उप्पयाः उकियात अभ् न्त्याकावं यंकेगुलि

सार्वजनिक, सांस्कृतिक व स्थानीय महत्वया खँयात समाचार व मेमेगु ज्याभवः पाखें प्रसार यायेत छसिकथं थीथी राष्ट्रिय भाषायात छचलावं यंकेमाः । (पौ-२१)

भारत, सिंगापुर,स्विट्जरलैण्ड थुज्वःगु बहुभाषिक राष्ट्रय् थें नेपालय् नं थीथी भाषिक समुदायया मनूतयत्त सहुलियत बीत छगू सिवें उप्पः सरकारी ज्याखँया भाय्या परिकल्पना यायेगु नं युक्तिसंगत जूवइ । (पौ-२२)

‘शिक्षापाखें मस्तय् नुगः सालेत दक्कले न्हापां उमित साक्षर दयेकेमाः । साक्षरता उप्पयेकेत मांभासं प्रारम्भिक शिक्षा बीगुयात हःपाः बीमाः । १९९० ई. स थाइल्याण्डय् जूगु सकलया निंति शिक्षा विषयक विश्व सम्मेलनं थ्वहे खँय् क्वातुक बः ब्यूगु खँ लुमकेबह जू । पौ-२३)

शिक्षाया अवसरयात थुकथं सर्वसुलभ

दयेकेगु लैपुइ पला: छीबलय् मस्तय् मांभाय्या
माध्यमं शिक्षा ब्यूसा थुगु आजुइ (सकलया नितिं
शिक्षा) थ्यंकेत भन जक याउँसे च्वनिगु व
अःपुइगु खः । (पौ-२४)

टेलिभिजनया माध्यमं राष्ट्रिय भाय्या
समाचार व मेमेगु ज्याभवः छसिकथं न्ह्याकेगु
जुइमा: । (पौ-३४)

रेडियो व टेलिभिजनपाखें थीथी विषय
नाप स्वापू दुगु सुचं, विज्ञापन, आदि विषय
राष्ट्रिय भासं प्रसारण यायेगु ब्यवस्था जुइमा: ।
(पौ-३४)

स्थानीय प्रशासनयात अझ उज्वः
धिसिलाकेगु व जनमुखी दयेकेगु नितिं सम्बन्धित
थासय् स्थानीय भाय् छचलेगु ब्यवहारिकतायात
नं नुगलय् तया: तिवः बियावं वनेगु पाय्छि
जुइ । (पौ-३४)

स्थानीय अड्डा अदालतया ज्याखँय्
गष्ट्रभाषा (खँयभाय्) मथूपिन्त दोभाषे
चूलाकाबीगु पाय्छि जुइ । (पौ-३४)

राष्ट्रिय जनजाति उत्थान प्रतिष्ठान
स्थापना यायेया नितिं प्रतिवेदन - २०५३ (संयोजक
- सन्त बहादुर गुरुङ्ग)

मांभासं शिक्षा दिक्षा बीत हःपा: मदुगुलिं
याना: फुक्क धैथें जनजाति मस्त शिक्षा दिक्षा
कायेमखंका च्वनेत बाध्य दु । (पौ-२४)

जनजातितय् भाय् व लिपि अड्डा
अदालत, विद्यालय व संचारय् छचले मदुगुलिं
नं जनजातितयत् थीथी कथंया ब्यवहारिक पगः
वयाच्वंगु दु । (पौ-२७)

नेपालय् जनजातितय् समस्या मूलतः
राजनैति प्रकृतिया खः । (पौ- २६)

जनजातितय् प्रति सम्बेदनशिल
पाठ्यक्रम प्राथमिक तगिं निसें उच्च शिक्षाय्
तक मदु, लोकसेवा आयोगपाखें सरकारी सेवाय्
वनेत धैधैबल्ला: यायेगु थःगु हे भासं यायेगु
अधिकार मदुगु व रेडियो व टेलिभिजन पाखें
जनजातितय् मांभाय् शिक्षाप्रद ज्याभवः प्रसार
यायेगु मजगु नं मू शैक्षिक समस्या खः । (पौ-
२६)

जनजातितय् सम्बन्धय् नीतिया म्हाति,
निर्णय यायेगु थासय् जनजाति मदुइगु, श्री ५
या सरकारया सेवापाखें प्रशासन, प्रहरी व सेनाय्
जनजातितय् ल्या: तचवकं म्हो जूगु व
भावनात्मक एकता मदुगुलिं नं समस्या कथ
नालेगु यानावयाच्वंगु खः (पौ- ३८)

